

Na osnovu člana 2. stav (2) Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15 i 11/19) i člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14-Novi prečišćeni tekst i 37/14-Ispravka), Vlada Kantona Sarajevo na 20. sjednici održanoj 16.05.2019. godine, donijela je

## UREDBU

### O VRSTI I POSTUPKU OBJAVLJIVANJA PROPISA I JAVNOSTI RADA ORGANA UPRAVE, JAVNIH PREDUZEĆA, JAVNIH USTANOVA I PRAVNIH LICA ČIJI JE OSNIVAČ KANTON SARAJEVO

#### POGLAVLJE I - OPĆE ODREDBE

##### Član 1.

(Predmet)

Ovom uredbom uređuje se vrsta i način objavljivanja propisa i drugih akata koje donose organi uprave, javna preduzeća, javne ustanove i pravna lica čiji je osnivač Kanton Sarajevo, (u daljem tekstu: organi javnog sektora), te način ostvarivanja i obezbjeđivanja javnosti rada organa javnog sektora.

##### Član 2.

(Rodna neutralnost izraza)

Izrazi koji se koriste u ovoj uredbi, a imaju rodno značenje koriste se neutralno i odnose se jednako na muški i ženski rod.

#### POGLAVLJE II - VRSTA I POSTUPAK OBJAVLJIVANJA PROPISA

##### Član 3.

(Propisi i drugi akti)

- (1) Pod propisima i drugim aktima iz člana 1. ove uredbe smatraju se svi akti koji imaju karakter općih akata, a naročito:
  - a) Ustav Kantona Sarajevo;
  - b) zakoni,
  - c) statuti,
  - d) osnivački akti organa javnog sektora,
  - e) uredbe,
  - f) odluke,
  - g) pravilnici, kao provedbeni propisi zakona,
  - h) svi pravilnici koje donose organi javnog sektora iz svoje nadležnosti,
  - i) uputstvo, naredba, instrukcija koja ima karakter općeg akta
  - j) zaključak i
  - k) inicijative.
- (2) Pod pojmom "karakter općeg akta", smatraju se svi propisi koji imaju ili mogu imati utjecaja na javnost (građanstvo, pravna lica i sl.).
- (3) Pored propisa navedenih u stavu (1) ovog člana, objavljuju se i svi drugi akti potpisani sa stranim organizacijama (memorandum i razumijevanju, međusobna saradnja, pomoć i sl.), osim ako to posebnim propisom nije izričito zabranjeno.
- (4) Izuzetno od odredbi ovog člana, organi javnog sektora neće objavljivati propise i druge akte koji su, u skladu sa Zakonom o zaštiti tajnih podataka ("Službeni glasnik BiH", br. 54/05 i 12/09), zaštićeni oznakom tajnosti.

##### Član 4.

(Način objave)

- (1) Shodno odredbama člana 4. Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15 i 11/19) (u daljem tekstu: Zakon), svi propisi i drugi akti se objavljuju u "Službenim novinama Kantona Sarajevo".
- (2) Pored obaveze iz stava (1) ovog člana, propisi i drugi akti iz člana 3. ove uredbe, obavezno se objavljuju na službenoj web stranici organa javnog sektora.

- (3) Propise i druge akte iz člana 3. ove uredbe, organi javnog sektora dužni su objaviti na svojoj web stranici u roku ne dužem od pet dana od dana njihovog donošenja.

Član 5.  
(Izuzeci)

Izuzetno od odredbi člana 3. ove uredbe, organi javnog sektora dužni su objaviti na svojoj web stranici i pojedinačne akte koji nemaju karakter općeg akta:

- a) rješenja i odluke o odobravanju isplata svih vrsta naknada zaposlenim u organima javnog sektora;
- b) rješenja i odluke i svi drugi akti koji se odnose na provođenje postupaka javnih nabavki, osim ako Zakonom o javnim nabavkama ("Službeni glasnik BiH", broj 39/14) i podzakonskim aktima proizašlim iz ovog zakona nije zabranjeno.

POGLAVLJE III - JAVNOST RADA ORGANA JAVNOG SEKTORA

Član 6.  
(Javnost rada)

- (1) Javnost rada organa javnog sektora ostvaruje se u skladu sa Zakonom o slobodi pristupa informacijama u Federaciji Bosne i Hercegovine ("Službene novine Federacije BiH", br. 32/01 i 48/11), Uputstvom za provođenje Zakona o slobodi pristupa informacijama u Federaciji Bosne i Hercegovine ("Službene novine Federacije BiH", broj 57/01) i vodičem za pristup informacijama svakog organa javnog sektora.
- (2) Pored javnosti rada propisane u stavu (1) ovog člana, javnost rada organa javnog sektora ostvaruje se neposrednim pristupom putem web stranice organa javnog sektora.
- (3) U pravilu, svi organi javnog sektora dužni su imati svoju zvaničnu registrovanu web stranicu.
- (4) Organi javnog sektora, kod kojih nije uspostavljena zvanična web stranica, dužni su uspostaviti zvaničnu web stranicu bez odlaganja, a najkasnije u roku od 60 dana od stupanja na snagu ove uredbe.

Član 7.  
(Obavezan sadržaj web stranice)

- (1) Organi javnog sektora su dužni, učiniti javnim i dostupnim sve propise i druge akte propisane ovom uredbom.
- (2) Web stranica organa javnog sektora mora sadržati aktivnu službenu e-mail adresu, broj telefona, broj fax-a i adresu, putem koje se građani i šira javnost mogu obratiti za bilo koju informaciju iz nadležnosti organa javnog sektora.
- (3) Svaka web stranica organa javnog sektora obavezno sadrži odjeljak/sekciju u kojem će se nalaziti svi propisi i drugi akti propisani Zakonom i ovom uredbom.
- (4) Pored odjeljka/sekcija iz stava (3) ovog člana, organi javnog sektora obavezno objavljuju na svojoj web stranici:
  - a) odgovore na postavljena pitanja zastupnika zakonodavnih i/ili predstavničkih tijela svih nivoa vlasti koja se odnose na djelokrug rada organa javnog sektora;
  - b) mišljenja koja pribave organi javnog sektora ili koje nadležne institucije daju o značajnim pitanjima iz djelokruga rada organa javnog sektora;
  - c) izvještaje o radu organa javnog sektora;
  - d) finansijske planove organa javnog sektora;
  - e) izvještaje revizorskih kuća o poslovanju organa javnog sektora;
  - f) informacije o sjednicama tijela organa javnog sektora (skupštine, upravni odbori, nadzorni odbori, i drugi organi koji su uspostavljeni u organima javnog sektora), sa navođenjem dnevnog reda tih sjednica.
- (5) Odredbe ove uredbe ni na koji način ne isključuju ili ograničavaju organe javnog sektora da na svojim službenim web stranicama postavljaju informacije i obavještenja za koje smatraju da su neophodni za javnost.

Član 8.

(Primjena Pravila i postupaka za izradu zakona i drugih propisa)

Organi javnog sektora su dužni, prilikom izrade propisa i drugih akata koji imaju karakter općih akata, primjenjivati Pravila i postupke za izradu zakona i drugih propisa Federacije Bosne i Hercegovine ("Službene novine Federacije BiH", broj 71/14), i omogućiti zainteresiranoj javnosti učešće u postupku pripreme propisa i drugih akata koji imaju karakter općih akata.

Član 9.  
(Javnost rada prema osnivaču)

- (1) Organi javnog sektora su dužni učiniti javnim i dostupnim sve propise i druge akte na koje se odnosi ova uredba, uključujući i pojedinačne akte iz člana 5. ove uredbe, zakonodavnim/predstavničkim tijelima koji su ih osnovali, njihovim stalnim radnim tijelima i izvršnim organima osnivača, na njihov zahtjev.
- (2) Organi javnog sektora dužni su, po prijemu zahtjeva iz stava (1) ovog člana, dostaviti sve tražene propise i druge akte u roku ne dužem od osam dana.
- (3) Po potrebi, organi javnog sektora mogu organizovati polugodišnje, godišnje press konferencije, s ciljem upoznavanja javnosti sa svojim kontinuiranim poslovima, kao i sa poslovima od posebnog značaja za Kanton Sarajevo.

POGLAVLJE IV - NADZOR, KAZNENE I ZAVRŠNE ODREDBE

Član 10.

(Primjena Zakona o zaštiti ličnih podataka i Zakona o zaštiti tajnih podataka)

Organi javnog sektora, prilikom provedbe ove uredbe, dužni su poštovati odredbe Zakona o zaštiti ličnih podataka ("Službeni glasnik BiH", br. 49/06, 76/11 i 89/11-Ispravka) i Zakona o zaštiti tajnih podataka ("Službeni glasnik BiH", br. 54/05 i 12/09).

Član 11.  
(Nadzor nad primjenom)

Nadzor nad primjenom odredbi ove uredbe vrše resorna ministarstva Kantona Sarajevo.

Član 12.  
(Kaznene odredbe)

- (1) Novčanom kaznom od 1.000,00 do 2.000,00 KM kaznit će se odgovorno lice u organu javnog sektora:
  - a) ako ne objavi propise i druge akte iz člana 3. ove uredbe (član 4.);
  - b) ako ne objavi pojedinačne i druge akte iz člana 5. ove uredbe;
  - c) ako ne uspostavi zvaničnu web stranicu u roku iz člana 6. ove uredbe;
  - d) ako web stranice ne sadrže e-mail adresu i sekciju/odjeljak u kojem će se nalaziti svi propisi i drugi akti propisani ovom uredbom (član 7. st. (2) i (3));
  - e) ako web stranica ne sadrži podatke propisane članom 7. stav (4). ove uredbe;
  - f) ako organi javnog sektora ne primjenjuju Pravila i postupke za izradu zakona i drugih propisa prilikom izrade propisa i drugih akata koji imaju karakter općeg akta (član 8.).
- (2) Za ponovljeni prekršaj iz stava (1) tač. a) i b) ovog člana, odgovorno lice u organu javnog sektora kaznit će se novčanom kaznom od 2.000,00 do 3.000,00 KM.
- (3) Novčanom kaznom od 3.000,00 do 5.000,00 KM kaznit će se poslodavac - organ javnog sektora za prekršaje iz stava (1) ovog člana.

## Član 13.

(Neprimjenjivanje ili nepoštivanje odredbi ove uredbe)

Neprimjenjivanje ili nepoštivanje odredbi ove uredbe predstavlja osnov za smjenu odgovornog lica organa javnog sektora, koju pokreće organ nadležan za razrješenje odgovornog lica organa javnog sektora.

## Član 14.

(Objavljivanje akata)

- (1) Organi javnog sektora iz člana 1. ove uredbe su dužni, putem svojih zvaničnih web stranica, u roku od 30 dana od dana stupanja na snagu ove uredbe učiniti dostupnim i javnim sve propise i druge akte na koje se odnosi ova uredba.
- (2) U slučaju da organi javnog sektora nemaju zvaničnu web stranicu, dužni su učiniti dostupnim i javnim sve propise i druge akte na koje se odnosi ova uredba u roku od 30 dana, po proteku roka iz člana 6. stav (4) ove uredbe.

## Član 15.

(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-20408-5/19  
16. maja 2019. godine  
Sarajevo

Premijer  
**Edin Forto**, s. r.



# SLUŽBENE NOVINE

## KANTONA SARAJEVO

Godina XXIX - Broj 29

Četvrtak, 25. 7. 2024. godine  
SARAJEVO

ISSN 1512-7052

### KANTON SARAJEVO

#### Vlada Kantona Sarajevo

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 2. stav (2) Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15, 11/19 i 35/22), Vlada Kantona Sarajevo, na 32. sjednici održanoj 12.07.2024. godine, donijela je

#### UREDBU

#### O IZMJENAMA UREDBE O VRSTI I POSTUPKU OBJAVLJIVANJA PROPISA I JAVNOSTI RADA ORGANA UPRAVE, JAVNIH PREDUZEĆA, JAVNIH USTANOVA I PRAVNIH LICA ČIJI JE OSNIVAČ KANTON SARAJEVO

##### Član 1.

(Izmjena člana 4.)

U Uredbi o vrsti i postupku objavljivanja propisa i javnosti rada organa uprave, javnih preduzeća, javnih ustanova i pravnih lica čiji je osnivač Kanton Sarajevo ("Službene novine Kantona Sarajevo", broj 21/19), u članu 4. stav (1) mijenja se i glasi:

"(1) Shodno odredbama člana 4. Zakona o objavljivanju propisa i drugih općih akata u "Službenim novinama Kantona Sarajevo" ("Službene novine Kantona Sarajevo", broj 18/11 - Prečišćeni tekst, 36/15, 11/19 i 35/22) (u daljem tekstu: Zakon), svi propisi i drugi akti se objavljuju u "Službenim novinama Kantona Sarajevo".

##### Član 2.

(Izmjena člana 5.)

Član 5. mijenja se i glasi:

##### "Član 5.

(Izuzeci)

Izuzetno od odredbi člana 3. ove uredbe, organi javnog sektora dužni su objaviti na svojoj web stranici slijedeće akte koji nemaju karakter općih akata:

- rješenja i odluke i sve druge akte koji se odnose na provođenje postupaka javnih nabavki, osim ako Zakonom o javnim nabavkama ("Službeni glasnik BiH", broj 39/14 i 59/22) i podzakonskim aktima proizašlim iz ovog zakona nije zabranjeno;

- kvartalne zbirne izvještaje o isplati novčanih naknada zaposlenim u organima javnog sektora, koji sadrže vrstu novčane naknade i ukupan iznos isplaćenih naknada (npr. rad u komisijama za koje se plaća naknada, prekovremeni rad i sl.)."

##### Član 3.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-36144-2/24

12. jula 2024. godine  
Sarajevo

Premijer  
Nihad Uk, s. r.